



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :



Tir Yimyim



tir_yimyim



tir yimyim

TAPAK 8

March 2026 tashinung India
nungi Naxalism samatsü

Mats Hummels asaya
nungi anisüngzüker



VOL. XXII ISSUE NO. 172 (ADOK 172)

DIMAPUR

AMUNGNÜ (SUNDAY)

RONGCHII (APRIL) 06, 2025

₹ 5.00

Nagaland sorkari Amit Shah nungi osang atar

Mon, April 5, 2025 (TYO): Union Home Minister Amit Shah den Naga yimten tebilemtsü aser Free Movement Regime (FMR) onüktem lemsateptsü atema pa nungi osang atar ta Nagaland sorkari metetdaksüogo.

"March ita Assembly session agidang party ajak nungi teshimtet telok ka Delhi-i oa Amit Shah dang Centre-i Free Movement Regime (FMR) agienba aser Protected Area Regime (PAR) benokba magizükba ashiba den Naga yimten tekaraba nung latettsü rongshitsü shia liasü" ta Konyak Heritage Complex lapoktsüdag aser Aoleang benjung nung osangbener den jembidang CM Rio-i ashi.

Tawa Guwahati nung North Eastern Council senden amendang paisa Amit Shah aser Assam Chief Minister Himanta Biswa Sarma na den senden amenba indang ashi.

"Iba senden nung Shah-i mapang tajung ka nung onok ajatsü ta ashi aser onok iba osangji atar" ta Rio-i ashi.

Nagaland sorkari Naga yimten teloktem den ajuruteptsü asü koda ta asüngdangdang "Onoki parnok den ajurutepa onok tebilembatam lemsatepa arur aser parnok Framework Agreement (NSCN-IM) aser Agreed Position (Working Committee Naga National

Political Groups) nung sign sütepogo" ta Rio-i langzü.

"Naga yimten teloktemi agreement atema lemtet agitsü atadar saka parnok Centre den tenangzüktep agiba nung onük balala lir. Iba ya onok atema kanga tasak kechiyong onoki rasaa meshiteter" ta paisa ashi.

"Ajisüaka lemtet ka agitettsü teimla lir. Nübertemi ajak adenba, ajaki agizüktetba aser akhümtet lemtet ka aginür aser sorkari iba atemaji merangdar" ta Rio-isa shisem.

Working Committee of NNPGs convenor Kitovi Zhimomi mapa nungi anentsüba sülen telok ana lemsaba atema asüngdangba pai telangzüba kecha magütsü ajisüaka pai Naga nung tsüngda telemsa madoktsüla ta ashi.

"Tesüiba nung sorkari Naga yimten teloktem den 'equi-distance' tangatetba nung inyakshangshia aru saka 2003 nungi ozü sorkari 'equi-closeness' tangatetba nung inyaka arudar" ta CM Rio-isa ashi.

"Sorkari ajak den jembitsüla aser ajak den kasa tesentaktep ayutsüla. Parnoki anganü yonga mesüra manganü yonga onoki jembitsü aser onok tebilemba lemsateptsü. Iba tangatetba tajung nung onoki inyaker saka parnokia olemteper asünung parnok ang lemtet agitsü" ta paisa metetdaksü.

Centre-i Meitei aser Kuki lennirtem den ajurutept

Guwahati, April 5, 2025 (Agencies): Manipur nung yimjung bener arutsü mechi nung Centre sorkari April 5, 2025 nü Meitei aser Kuki nung den senden ka menogo.

May 2023 nü kin o kin tsüngda mangatettep adoker rarayonga aruba anendaktsütsü atema Centre-i iba senden menogo.

Meitei nung tenüng nung All Manipur United Clubs' Organisation (AMUCO) aser Federation of Civil Society Organisations (FOCS) nungi teshimtet nisungtem aden.

Külen, Kuki nung tenüng nung lennir 9 aden aser Centre tenüng nung Intelligence Bureau nung retired Special Director A.K. Mishra-i interlocutor ama shilem agi.

April 3 nü Lok Sabha nung Manipur atema o atsütepa jembidang Union Home Minister Amit Shah-i olen ka ashiba sülen tanü senden menogo.

Ministry of Home Affairs (MHA)-i Meitei aser Kuki teloktem den olemtep balala agia arudar aser kobi melii joint meeting ka ayonga amentsü sentong lir ta Amit Shah-i shia liasü.

Manipur nung taoba Chief Minister N. Biren Singh-i February 9 nü menden toktsüba

sülen February 13, 2025 nü President's Rule benoka liasü.

Liangmai Naga lennirtem amak

Manipur nung Kuki-Zo aser Meitei nung tsüngda Centre-i yimjung bener arutsü merangdang Honibarnep Konsaram yimtsüng nung lendong ka ataloka tensa tamajungba küma aotsü ama kümogo.

Prangpong amertemi Konsaram kübok Zeliangrong Colony nung Liangmai Naga nung amak. Iba tatalokba nung yimdakilr tenet-ti ka yiru aser parnok rongnung tanishir ana dena lir ta osang angazüker.

Tena ya Village Chief Aimson Abonmai (65) aser Village Chairman D. Adam (40) na lir. Prangpong abenertemi tenaprong dak azük aser gari raksatsü.

Indigenous People's Forum Manipur (IPFM) president Ashang Kasar-i Liangmai Naga lennirtem amakba aitsüogo.

"Liangmai Naga kin lennirtem amakba ya Naga nung ajak amakba den kasa lir. Onok sobaliba nung village chiefs aser chairmen kanga akhümtsübur. Parnok dak teka sangshibaji Naga customary law alema inyakba lir aser lisopurtem amakba lir" ta Kasar-i ashi.

CM Rio-i Konyak Heritage Complex lapoktsüogo



Mon, April 5, 2025 (TYO): Chief Minister Neiphiu Rio-i April 5, 2025 nü Mon jila nung Konyak Heritage Complex lapoktsüogo.

Nagaland nung Konyak nung ya nütsüng yongsük teimtiba aliba kin ka lir aser Union Minister of State for Education and DoNER, Dr. Sukanta Majumdar lia Konyak nung asoshi Heritage Complex lapoktsü.

Iba heritage complex nung Mon district kübok assembly constituency 9 tenüng nung arjitem yanglua lir. Iba complex nungsa amphitheater ka, Konyak nung osettsüset indang museum ka aser multi-purpose hall ka lir.

North Eastern Council (NEC)-i Ministry of

Development of North Eastern Region (DoNER) ajanga iba heritage site atema Rs 24 crore agüja liasü. State sorkaria complex nung mapatong kar atema senotsü agütsü aser iba nung gari lenmang yangluba densema lir ta CM Rio-i ashi. "Konyak Heritage Complex ya Nagaland sorkari terenlok mapa inyakba ka lir aser lokti aintsü atema inyakba mapa ka. Iba complex nung morungs, modern sports facilities, aser art, creativity & talent atema tawatem lir" ta CM Rio-isa ashi.

Konyak nung ya Naga nung rongnung kin tulutiba lir aser nenoki Naga nung sobaliba aser maitsü wazüka aser kümzüka ayutsü asoshi len anitsü

imlar. Talisa nenoki anir Naga kin ajak longjemtsü mapa inyatsü teimla ayur ta paisa ashi.

"Naga nung maitsü kümzüka ayutsü atema British nungeri Bengal Eastern Frontier Regulation (BEFR) Act 1873 lateta yutsü. India nüjiso anguba sülen-a iba ya nungita Indian Constitution nung Article 371(A) enoksem aser iba ajanga Nagaland nung sobaliba aser inyakshangshi kümzüka ayur" ta Rio-isa metetdaksü.

"Nagaland nung alirtemi asen maitsü, sobaliba aser inyakshangshi kümzüka ayutsü ayongzüker. Asenoki asen sobaliba senmang wazüka ayutsüla aser cultural tourism ajungkettsüla" ta paisa ayongzüker.

DoNER-i North East renlokdaktsütsü: Union MoS Dr Majumdar

Mon, April 5, 2025 (TYO): North Eastern region renlokdaktsütsü atema Ministry of Development of North Eastern Region (DoNER)-i len anir inyaker ta Union Minister of State Dr Sukanta Majumdar-i ashi.

India sorkari North Eastern State tem asoshi tenangzüka agiba nung Ministry tentetba ya tongtipang liasü kechiyong iba ajanga North East nung tebilemtsü balala aliba angatet, ta Majumdar-i ashi.

Prime Minister Narendra Modi lenisüba kübok tesüiba küm ishika tsüngda North Eastern State tem renlokogo. Sorkari iba tesem renlokdaktsütsü meranger" ta paisa ashi.

"Ministry of DoNER aser Centre sorkari tesüiba küm ishika Nagaland nung mapa aika inyakba arur. Tang tashi nung Rs 5081 crore endoka mapatong 420 lezmüksüogo. Item ya Ministry of DoNER kübok NESIDS (Roads), NESIDS (Other than road infrastructure), Schemes of NEC aser PM-DEVINE amala mapatongtem lir aser infrastructure, healthcare,

education, & employment generation nung temulung agütsür" ta MoS Majumdar-isa metetdaksü.

Mapatongtem rongnung 305 tashi renemogo aser iba nung Rs 3185 crore endokogo aser Nagaland nung alirtem nem tajangzüker bentsür aruogo, ta paisa ashi.

"Ministry of DoNER-i Nagaland dena Northeast nung rongsenketzüng renloksü aser shishilembaba arentsü atema tenangzüka lir. 2023 nungi tang tashi nung investor roadshows 9 tashi agiogo aser itemji Mumbai, Hyderabad, Kolkata, Chennai, Bengaluru, aser Ahmedabad yimitemnung dena agi" ta pai ashi.

"Item roadshows ajanga Nagaland nung shishilembatsü aser industry ulushitsü lenmang sadema aliba metetdaksüogo. Item sentong ajanga MoUs 82 aser investment intents sign sütepogo aser taruba kümtem Nagaland nung Rs 8671.2 crore tashi invest asütsü" ta MoS Majumdar-isa metetdaksü.

"Kohima Smart City Mission kanga tejakleni odar aser Rs 550

crores shi endokogo. Iba ajanga urban infrastructure, sanitation, aser digital connectivity tajungba kümogo aser NESIDS Infrastructure Projects ajanga Nagaland nung skill development infrastructure jenjang melenshiogo" ta paisa ashi.

Tourism sector tsütsü Swadesh Darshan aser PRASAD Schemes ajanga Nagaland nung major tourism circuits renlokogo aser domestic o international visitors atsür aruba den mapa inyaksü maongkatem adokogo ta Dr. Majumdar-isa ashi.

"Benjungbentsü ajanga sobaliba wazüka ayur aser Konyak nungeri kanga dang longsoa sobaliba benjungba angudang kanga pelar" ta pai ashi.

"Aoleang benjung ajanga küm tasen aser tsünusenbongba mongpu tenzüka sayur. Iba ya tepela, longjemba aser tenüngsang agütsüba mapang ka lir. Tsüngsangtem, kentenmenü aser sobaliba sobutsü tobur tajungtem ajanga Konyak nung sobaliba nung nüma atangba sayur" ta MoS Majumdar-isa metetdaksü.

HWC Mopungchuket nung NQAS External Assessment agiogo



Dimapur, April 5, 2025 (TYO): April 5, 2025 nü HWC Mopungchuket, Mokokchung nung National Quality Assurance Standards (NQAS) External Assessment agiogo.

CHO HWC Mopungchuket Rongsenlila-i NQAS external assessment indang okila jembidang External Assessors-District Consultant (Quality Assurance) Assam Bikash Ranjan Dutta aser Public Health, Collective Good Foundation Delhi Lead Dr. Vibhor Kumar na pelaa agizük.

Laisa Department nungi facilitator DQM Kohima Dr. Imnanoktsung Longchar, HWC Mopungchuket nung staffs,

Chief Medical Officer, Mokokchung nungi staff, VHC züngsemtem aser sentong nung adener ajak pela agizükba metetdaksü.

Rongsenlila-isa HWC Mopungchuket indang PowerPoint presentation ka sayu aser idakji 1967 nung amenokba aser 2019 nung Health & Wellness Centre jenjang nung ajungketba metetdaksü.

HWC Mopungchuket ajanga nisung 971 anepalur ta laisa ashi.

Village Health Committee-i HWC den amalitep akaba aser shilem tajung agiba atema pelar aser maneni quality health care services nungita yaritsü

ayongzüker ta laisa ashi.

"Village Health Committee aser yimdaklirtemi Health & Wellness Centre anepaluba atema tenüngsang agütsür" ta Dr. Vibhor Kumar-i ashi.

Paisa ASHAs-i merangba inyakba indang olen ka ashi aser parnok ya Health system nung tongtoret lir ta shisem.

NQAS Certification Programme ya National quality certification tematiba lir aser iba ya 2013 nung tenzüka liasü.

Iba kulikaket ya International Society for Quality in Healthcare (ISQua) nung accredit ser National quality assurance standard criteria tongtetba atema agütsür.

Zeliang nunger ketdangsürtem Peren nung mungdang amung

Dimapur, April 5, 2025 (TYO): April 4, 2025 nungi Zeliang Officers' Association Nagaland (ZOAN) indang 8 buba General Conference tenzüka tanü tembangogo.

Iba sentong ya DC Conference Hall, District HQ, Peren nung agi aser Dy. Chief Minister & Planning & Transformation and National Highways Minister incharge TR Zeliang-i tetushi süa jaoker ka ama shilem agiogo.

"Asenok tanü alir aser tarutsü atema asalentong yanglur. Tesüiba nung asenok atema mapa tenzüka yutsürtem nem tetushi agütsüsüla. Iba mapang asenoki tesüiba meyipa repringshitsüla aser asenok tang kong noktaka lir asadangtsüla" ta TR Zeliang-isa ashi.

"Zeliang nunger putu tasen nung alir ajisüaka tanü putu ainba den sobaliba, oshi aser senmang wazüka ayutsübaji kanga tongtipang lir. Tatem nungbo asen

sobaliba aser maitsü ajanga dang asenok jangjatsütsü aser asenoki itemji samadaksüra, asenok samatsü" ta paisa ashi.

Zeliang nunger ketdangsürtemi len anitsüla aser kati ka ayongzüktepa sobaliba aser maitsü wazüka ayutsüla, ta TR Zeliang-isa ashi.

"Lanurtem ya asenok atema tashi tulutiba lir aser tashi itdaksütsüla, saka parnok len anir mali senzür. Anungji lanuputui equality education, skill development aser employment maongkatem agütsüsüla. Iba dak sendakba nung Extended District HQ nung Polytechnic Institute aser Industrial Training Institute (ITI) amenokba ya kaketshirtem maliba ajanga mapa metenzükteti lir" ta paisa ashi.

Deputy Commissioner-i ZOAN den yariteptsüla aser lanurtem Government mesüra Private Sector nung training agitsü atema osang prokshitsüla ta paisa ayongzüük.

"Extended District HQ DC Office lapoker joko küm 10 tashi süia arur saka nisungtem talitsü atema marur. Kiojen aika anepaluba masüba agi raksadar anungji Extended District HQ ya model township ka kümdaksütsü atema Deputy Commissioner-i local officers aser staff nem kimung lezmükja pei pei ki yangludaksütsüla" ta TR Zeliang-isa metetdaksü.

Paisa ketdangsürtem dang lokti tesentaktep akangshitsü aser külemi inyaka aotsü ayongzüük.

Iba sentong nung ZOAN kümsük 2025-2027 atema ketdangpur tasentem atema Executive Secretary, LBA, Rev. Wichampau Nchang-i meshiteta sarasademtsü.

April 4, 2025 nü Village Councils aser Civil Society Organizations den sentong ka agidang DC Peren Hiazu Meru aser ADC Peren, Keyirangding Hegui nati shisalen balala sayua liasü.



Chiechama yimtsüng nung zünger tambutiba rongnung ka Lida Peli nungeri April 5, 2025 nü Chiethu, Kohima nung tsük atemba sentong ka ayongzüka agidang agiba noksa angur. Iba sentong nung Chiechama nunger teintet rogotemi anir tanurtemia shilem agia liasü.

Mkg nung Moatsü benjung atema senden amen

Dimapur, April 5, 2025 (TYO): Mokokchung Deputy Commissioner, Thsuvisie Phojo (NCS)-i Moatsü Mini Hornbill Festival 2025 amungtsü aliba atema senden ka ayonga menogo.

April 4, 2025 nü DC conference hall, Mokokchung nung co-ordination meeting amen.

Senden nung Ao Senden Tir, Marsanen Imsong-i sub-committees nem mapa lezmüksüba indang osang lemsatop aser committee züngsemtem dang Moatsu Mini Hornbill Festival 2025 takok ngua amungtsüsa mapa inyaksü ayongzüük.

Taküm benjung anogo asemnü- May 1 nungi 3, 2025 tashi amungtsü aser May 2, 2025 nü Chief Minister Dr. Neiphiu Rio-i tongti tesemdang ama shilem agitsü ta Ao Senden Tirisa metetdaksü.

Iba senden nung ADC Mokokchung, Chumlammo Humtsoe menden liasü aser Mokokchung Municipal Council Chairman,, Watsu Mungdang, Ao Kaketshir Mungdang (AKM), All Ward Union Mokokchung, Mokokchung Town Lanur Telongjem, Government Department ketdangsürtem, aser Gaonburas Union Mokokchung Town aden.

Mokokchung nung Tsungur yimtsüng tasen atema metetdaksür

Dimapur, April 5, 2025 (TYO): Mokokchung district nung Extra Assistant Commissioner, Ongpangkong Circle kübok yimtsüng tasen ka kümtetba agizüksü atema Mokokchung Deputy Commissioner Thsuvisie Phojo (NCS)-i sangdong ka agütsüogo.

Iba yimtsüng ya Tsungur Village lir aser recognised asütsü atema mapa inyaker, anungji iba dak sendakba nung ashishitep kar danga lira anogo 30 tsüngda DC office nung ken

o benoktsü metetdaksür, iba mapang süiba sülen 'No Objection' agütsütsü aser sorkar dangi abentsü ta Mokokchung DC-isa metetdaksüogo.

Tsungur Yimtsüng telongtet:

Area of land: 1007 Acres (or) 4075184 Square Meters

Boundaries:-
1. North :Milak River.
2. South :Khensa Village Land.
3. East. : Milak River.
4. West. : Kongpangyong Nallah.

NIPF-i Kohima nung atalokba aitsür

Dimapur, April 5, 2025 (TYO): Kohima nung tsümar kati Manipur tsür ka dak tim mesüi kongshiba aitsür ta Nagaland Indigenous People's Forum (NIPF)-i metetdaksüogo.

March 27, 2025 nü Bihar nunger Vivek Kumar-i arishi küm 21 tain tetsür ka dak tim mesüi kongshi.

Asen lima nung lisopurtem

lendong nungi jenbua maliba atema temulung raksar. Iba tesempatsü tatalokba ya sensotem aser teloktemi aitsütsüla ta NIPF-i sangdong ka nung ashi.

Maneni, tarutsü anogotem ibala mataloktsü atema ozüng amertemi aibelensang nem tapet temerenshi agütsütsüla ta General Secretary, NIPF Kiqheto-i sangdong ka nung ashi.

Kohima nung State Mega Legal Services Programme agitsü

Dimapur, April 5, 2025 (TYO): April 12, 2025 nü State Mega Legal Services Programme ka ayongzüka agitsü ta Kohima Deputy Commissioner, B Henok Buchem NCS-i Kohima district kübok villages/Wards ajak dang metetdaksüogo.

Iba sentong nung welfare legislations aser schemes indang osang prokshitsü, welfare schemes den nübortem sendakteptsü aser nübortem legal needs angatettsü.

NBCC Convention Hall, Kohima nung anüngdang 12:00 ako nungi nikongdang 06:00 ako tashi sentong agitsü aser Supreme Court of India nungi

judges, Minister of State (Law & Justice) Government of India aser Gauhati High Court nungi judges adentsü ta Kohima DC-isa metetdaksü.

Iba sentong nung Kohima district kübok Village Councils, Village Development Boards, Women Organisations Management Committee, Youth Organisations, Ward functionaries-i pei pei village/Wards nung nisungtem anidena arua adentsü metetdaksür ta paisa ashi.

Sentong ayongertemi chiyungtsü agütsütsü aser transportation atema Vizapale-9615629285 den tongteptsü akok ta Kohima DC-isa ashi.



Taoba deputy prime minister Jagjivan Ram asoba bilemteta New Delhi nung 'Samta Diwas' alidang tangokba noksa ka nung Congress lenir Rahul Gandhi aser taoba Lok Sabha speaker Meira Kumar nungertem angur.

China den toktepa India, UAE aser Sri Lanka tsüngta MoU zülutep

New Delhi, Rongchii/April 05 (Agencies): Indian Ocean region nung tongtipang inyakyim tali akumba nung mera ka ama Sri Lanka anüdoklen Trincomalee yimti nung energy hub yangertsü atema India, United Arab Emirates (UAE) aser Sri Lanka tsüngta tezüngzüktep ka Honibarnü zülutepogo.

Iba tezüngzüktep ya Ato Kilonser Narendra Modi-i Colombo semdangba mapang renem, koba taoba küm September ita Anura Kumara Dissanayake ya Sri Lanka tir akumba sülen PM Modi asoshi mezüngbuba iba asetkong linük semdang alitsü, aser ibai China den tali toktepba mapang regional cooperation temaitsü lir. "Trincomalee ya energy hub kuma yanglutsü atema Memorandum of Understanding (MoU) ya Government of the

Republic of India, Government of the Democratic Socialist Republic of Sri Lanka, aser Government of the United Arab Emirates tsüngta zülutep aser yangji Prof. K.T.M. Udayanga Hemapala, secretary, ministry of energy (Sri Lanka), aser Vikram Misri, Foreign Secretary (India) nungeri meyongnem agütsü," ta sorkari sangdong ka nung ashi.

Trincomalee ya natural deep-water harbour aser akhi mapang nungi tongtipang tesem ka lir aser yangji multi-product pipeline yanglutsü, World War II mapang yangluba oil tank farm amshitsü, koba Indian Oil Corporation (IOC) indang Sri Lanka subsidiary ajanga amshir. Iba ya regional energy logistic centre ka ama amshitsü imlar, kong India aser UAE nungi senotsü indoka aser technical bener arua amshitsü.

"energy cooperation atema Trincomalee ya regional hum ka akumtsü teimla tulu lir. UAE ya India asoshi energy partner tongtipang ka lir, anungji region nung iba ama inyakyim nung tang mezüngbuba lungjemtsü," ta Misri-i Colombo nung osangbener dang ashi.

Linük asem lungjemer project inyakba ya Sri Lanka nung India tashi ulushitsü merangba nung shilem ka alitsü, kechiaser iba asetkong linük nung Beijing-ia ki o jen project tulutem inyaka jenjang yanglutsü meranger, aser item rongnung Hambantota nung sen \$3.2 billion jenjang oil refinery amenokba ya ka lir.

India-i kanga yakyaka Colombo den jembishinüba ajanga tangbo UAE-ia shilem agir aser ibai Sri Lanka nung China tsüngnep ajemoka aliba den tokteper ama ajiteter.

Delhi nung Ayushman Bharat scheme tenzüktsü

New Delhi, Rongchii/April 05 (Agencies): BJP lenisüba kübok Delhi sorkari central sorkar den teka amteper linük yimtiba nung Ayushman Bharat Pradhan Mantri Jan Arogya Yojana (AB-PMJAY) tenzüktsü.

Honibarnü tezüngzüktep ka zülutepba ajanga Delhi ya linük nung iba health scheme amshiba state/Union Territory 35 buba akumer aser West Bengal kisüing iba scheme ya mamshir.

Iba healthcare programme yagi mozü, tashidak putetba, mozüki nung amungba, intensive care aser surgical interventions densema specialities 27 nung medical procedures 1,961 ayimjema complimentary treatment agütsür.

Delhi nung iba scheme amshitsü temsüa aliba kilen shia küm nung sen lakh 10 jenjang health insurance agütsütsü aser iba teyari ya centre aser Delhi sorkar tsüngta kasa lemsar menoktsü.

Iba tezüngzüktep zülutepba sentong nung Union Health

Minister JP Nadda aser Delhi chief minister Rekha Gupta dena liasü.

Nadda-i iba scheme indang tongmelang agi rateta jembidang, "Ayushman Bharat ya alima nung health coverage scheme tulutiba lir. Iba ya 'assurance scheme' lir. Socio-economic caste census ajanga makamaiter awajemba scheme ibai mezüngbuba lir. Tanü MoU zülutepba yagi kibong lakh 6.5 shi mesüra nisung lakh 30 shi ajangzüktsü," ta ashi.

MoU zülutepba sülen Delhi chief minister Rekha Gupta-ia iba yagi Delhi nung alirtemi mapang talangka nungi nüngdaka aliba healthcare agütsütsü, ta ashi.

"Taoba state sorkari Centre den toktepba yong Delhi nung aliba nüburtem akoksa. Ayushman Bharat yagi linük ajunga nung teyari angudang, yangi aliba nüburtem temang anepalutsü timtema liasü," ta lai ashi.

"Centre-i sen lakh 5 agütsüba nung Delhi sorkari sen lakh 5

inoktsütsü, anungji health insurance ya sen lakh 10 indang alitsü, Ibai Delhi asoshi tepelatsü mapa lir," ta laisa ashi.

AIMPLB-i linük tesem ajunga nung Waqf Bill anema nokdaksü

New Delhi, Rongchii/April 05 (Agencies): Tang tesüa Parliament nung Waqf Amendments agizükba aija All India Muslim Personal Law Board (AIMPLB) ajanga sangdong ka agütsüba nung iba ozüing yanglushiba ya Islamic values, Shariah, tamangba yimsü temeden, kin balala tangatettep nung aliba aser Indian Constitution tamendak dak anema inyakba lir ta ashi.

Board ketdangsür aser alakteta jaoker senden ka amenba sülen AIMPLB-i tamangba yimsü, kin aser lokti tentet balala den teka amteper iba amendments ya magien tashi nokdaksü sangdong.

Political party kar BJP indang "communal agenda" den sendakteper aser parnoki iba Bill bhukumba ajanga item party indang tereprangtsü tejangja sayuogo, ta Board-i aitsü.

March 2026 tashinung India nungi Naxalism samatsü: Amit Shah

New Delhi, Rongchii/April 05 (Agencies): Linük nungi March 2026 tashinung Naxalism samatsü, ta Union Home Minister Amit Shah-i Honibarnü ashi aser India ya "Laal Aatank" (Red Terror) nungi salatsü BJP sorkar temulungtetba nung lir ta ashi.

Chhattisgarh indang Bastar district nung Bastar Pandum benjong nung jembidang, "Tesüiba ita asem tsüngta Naxals 521 temai adokogo. 2024 küm kisüing nung 881 temai adok. Temai adokertem pelashishia agizüktsü, saka maneni nok-nü amshirtem security forces-i azüoktsü," ta Shah-i ashi.

"Agle March tak, hum poore desh ko is laal atank se mukt karne ka kaam Bharatiya Janata Party ki sarkar karegi" (BJP sorkari taruba March tashinung linük tesem ajunga nungi Naxalism samatsütsü), ta pai ashi.

Bastar ya mapang ka telungpur tesepe ka ama liasü, saka tangbo tetsübo mali aser teimla aser terenlok temaitsü kumogo, ta Shah-i ashi.

Taoba mapangbo yimten yimsüsürtem iba region semdangtsü majungshi.

"Lenirtemi yangi o mejembi. Chief minister-i iba tesemi

maotsüsa ashi. Saka tangbo Adivasi nunger adianu aser adianutsür 50,000 den asenok Ram Navami aser Ashtami benjonger," ta pai ashi.

Kasa sentong nung Chhattisgarh chief minister Vishnu Deo Sai, Deputy CM Vijay Sharma, cabinet ministers Kedar Kashyap aser Ramvichar Netam, aser BJP state president Kiran Singh Dev nunger dena liasü.

Iba sentong nung tribal artists temi sobaliba aser yimsüyimbong wazüka ayuba asoshi Shah-i tenüngsang agüja liasü.

Kasa mapang Chhattisgarh indang Balrampur district nung taoba mapang Naxal züingsem alir aser Naxal azüdokshi nung timtem ajurur alirtem nem Pradhan Mantri Awas Yojana (PMAY) kübok talitsü ki agütsü.

"Naxal azüdokshi agi kongshir mesüra temai adoker nisung 77 indang tenüing agizükogo. Item rongnung nisung 30 temsüa liasü aser housing atema nisung 23 agizükogo. Tanüingba nisung tenet ya technical timtem benteter agütsütsü," ta District Panchayat CEO Nayantara Singh Tomar-i ashi.



Palestine nüburtem bhukuma kaketshir temi Honibarnü New Delhi nung aliba Jantar Mantar nung longkak aitdang tangokba noksa nung angur.

ajanga memorandums agütsütsü.

"Save Waqf, Save the Constitution" omen nung ajemdaker Hokulbar anogo ka nungi tenzüka hopta ka tepiyong item maparen ya inyaksü.

Ano Delhi, Mumbai, Kolkata, Hyderabad, Bengaluru, Chennai, Vijayawada, Malappuram, Patna, Ranchi, Malerkotla, aser Lucknow yimtitem nung longkak aitsü. Iba maparen ya Delhi nung aliba Talkatora Stadium nung nüburtem adenshia tenzüktsü aser Eid al-Adha tashi alitsü asr iba sülen phase tanabuba sangdongtsü.

Sangdong nung Mujaddidi-i lanurtem dang süngjema alitsü ayongzüka liasü. Paisa telungjem, yimya tajung aser yimjung nung item maparen inyaksü ayongzüka liasü.



TIR YIMYIM YIMOBILEM (EDITORIAL)

DIMAPUR

AMUNGNÜ

RONGCHII 06, 2025

Tsüngremji Temeim lir

Yisu temeim osang tajung mamangba pur aser amangba purtem na prongla dang shia jajar tenyartem rongnung Temeim indang kanga süoki ia bilema jembiba tenyarji Yohan ya lir. Aji oda, Yisu alimai aruba nükjiongjia paiang "Tsüngremi alima odang meim nung Pai Pa chir ka dang aliba alima pur menen alangzüksü asoshi yok, anungji shibai Pa dak amangdir kodanga mesamatsü saka teti taküm angutsü, " ta Yohan 3:16 nung zülü. Ano, kasa Tsüngrem temeim angateta benshidaktsünüba agi paisa külem amangba purtem dangi shiti asem tashi zülü lir. Lashiba nung item shititem dangji Yohan shiti ta ajaba angur. Aji oda, nisung shingaia Tsüngrem mangu saka Tsüngremji asenok o asenok na meimtepa yaritepba nung angutsü ta 1 Yohan 4:12 nung pai ashibaji jagi Tsüngremji Temeim lir ta angateter. Atangji, asenok kati ka meimtepba agi tanela tekümtet angutsü ta Yohani mashir, saka kodang asenok Tsüngrem temeim agi kümzükdir, asenoki tangar dang meimnüsü aser meimtettsü, kechiyong Tsüngremji Temeim lir ta paisa tapu 4:16 nung ashiba angur. Aji oda, parnok mapanga aser tarutsü nunga Khrista anemer adokba aser adoktsüba indang "Antichrist" ojang amshia Khristantem kümdangshidaktsübaji tenyartem rongnung Yohan ya ka lir. Atangji, asenok rongnung temeim lemsatepbaji junger, saka shibai tama meim ta asüabajisa tongtibangba ya Yohan-isa asenok nem temeim jenjanga angatetdaksür, kechiyong nai ni meimba agi ni na meimbajibo, ashiko, ni nü dang sentsüh aoba mapa ka dang asütsüa akok, anungji ajibo temeim masü akümer. Aji oda, Tsüngremi asenok tama meim ta tapu 1 Yohan 4:19 nung shia angur. " Asenoki alima nung asen nuk agi anguba adianu danga mememtet nung kodaser asenoki manguba Tsüngrem dang meimtettsü(1 Yohan 4: 20) ta Yohani asenok dang ashibaji ochi o tuluka lir. Ano, 1Yohan tapu 5 nung asenok aika asoshi kanga dang tangatetsü tasak ka Yohani tekong 16 nung agüja alibaji tasütsüsa tai menaba aser tai menayonga tasütsü langabo memenaba indang shia aliba ya asütsü. Aji oda, asen adianu kar tai menayonga tasütsüsabo tai memenara pa atemaji sarasademjang saka tasütsüsa tai menar atemabo sarasadem tesütsü ta ashibaji angatetsü tasak saka sarasadema angatetsü merangtsüla. Süra tasütsüsa menaba taitemji kechisa aser masütsüsa menaba taitemjia kechisa ? Itemji temetetrnüsüka aser metettsüla. 1Korint 11 nungbo tenyar Pauli amangba purtem dang shibai Kibuba benjong mapatem mezügmeshidir aser metemsü sür chia jembir iba jagi Yisu temang aser azü mezügmeshiba akümer aser iba temenen jagi "nenok shiranger aser tasüa asür" ta shia angur. Iba jagi tanü putu nung asenok asoshi tasütsüsa menaba taitemji Yisu temeim aser taküm tenla mezügmeshiba aser atalabatem asütsü südi ta angateter. Aji oda, 1 Yohan 5 nung tasütsü indang ashiba ya tanela asütsüba indang masü saka shi temang asütsüba indang ashir ta asenoki angatetdi, kechiyong asenok asen temenen nangzükra Tsüngremi asen dang taochi agi tai adoktsübaji tenangzükba lir aser iba atemaji Yisu Khrista alimai aru. Ajisüaka,ashiko, asen temenen yari asenok shi nungbo timtem tekangshia angutsüa akok. Ano külen temenensa asüyonga masütsüsaba temenentemji koba temenen menabatem asenoki sasasetta taidok nangzükra aser jogo mebenshir, itemji asütsü, kechiyong Tsüngrem chirtemi temenen mapa meinyaker aser mebenshir kechiyong parnokji Tsüngremi awabanger aser temenen moiyingi mekongshitetter ta tapu 1 Yohan 5 tekong 18 nung shia angur. Aji oda, asenok Tsüngrem temeim nungi mepilatsü atema tenyar Yohani asenok dang , koba mapa aser chiyongtsütem agi asen mulungjang nung Tsüngrem aita meliteter, item nung jagi pilaa liang ta ashiba asenoki pai züluba shiti nung angur. Iba jagi asenok süaka shia arutsü aser teti taküm alitsü.

OLEMSABANG

Nenok kü kulitem asütsü

Lai - T. Mapa 1:8: Saka kodang tanela temeshi nenok dangi arudir, nenoki ain agizüksü aser Yirusalem nung, Yihuda O Samaria ajak nung, aser alima tatem tonga nenok ku kulitem asütsü.

Yisu Khristai iba o ya joko Pa iba lima toktsür tebu dangi aotsü mapang Olive tenem nung nokdaker Pa nüsüngtem den tatembang O jembiba lir. Asenoki tang asenok aliba lima nung obendangba yimya reprangdangra kuli makai shinga temeden angutsü makok. Ochishir aibelenaliba maliba nisung ka süaka pa/ la atema kulisüa jembir melira aser nokdaka kuli tabensa magutsütetra iba lima ozüng agibo shinga temeden mangutsü. Yisu Khristaa iba lima nung alidang temaba putir Kaifa aser Governor Pilate tsungdang obendangdak nokdak, aser Yisu Khrista atema kulisüa tasü ita nokdaker shinga mali asü. Pa nüsüngtemiang sünga shingaia tasü ita kuli süa menokdak, oda pai teti temulung toka aliba nüsüng Peter-ia süng pa atema kuli mesütet, pai-a anaben tashi menanzük. Ashiko Yisui iba to bilemteta nüsüngtem dang ajanga janga tazüngkunema iba O "Nenok kü kulitem asütsü" ta ashiba sudi ta asenoki bilemer. Yisu Khrista shia arur külen to Puti-ungertemi sepai tanükertem nem sen jenti agüja parnok mejanga alidang ayaterm nung Pa nüsüngtem arua Yisu temang leper nungi auyaa bener ao ta shiang ta ajangajanga nungdem. Aji oda Yisu Khrista shia marua ta alima dang sangdongtsü atema kuli tapet bushi". (Math: 28:13). Iba mapang Yisu nüsüngtemi anir pa taküm alidang pa sülen anitakertem aser pa dak amangertem kati tanga odi-odia tasü ita Yisu Khrista shia aruogo ta alima dang kulisüa nokdaktsü temulung moulutet. Aji süaka alima chubatem tashi aser Rome chubatiba tashi aser ozüng agi asen Kibuba Yisu Khrista shia aruba nembanga meyutet, pa shia aruba osang agi alima ajunga asüng.

Tasen Lai mapang nung Yisu Khrista sülen anidakertem aser pa dak amangertem dang mezüngbuba "KHRISTAN" ta ajaba ya Antiok Arogo nung tenzük. (T.Mapa-11:26) Kechiba nüsüngtem dang aser pa dak amangertem dangji iba tensa nungji "KHRISTAN" ta ajatsüsa aküm ta bushidangra, iba tensa nung parnok tamangertemji temeimtep telungjem nung temulung ka ser akang akanga kati ka den meimtepa liasü, aser parnok taküm jaklaliro, jembishinü, tejungtepnü, yimya awashi tajung, ajak den kasa litetba ibala yimya tajungtemji ngur alimapurtemi parnok dangji "KHRISTAN" ta tenüng agutsü. Tetezü parnok taküm yimya yagibo YISU KHRISTA dang mesüker ta ashiba liasü. Tamangertem jagi parnok sasa onok ya Khristana ta jatet masü; saka parnok taküm yimya ajanga tangari mamangertemi parnokji KHRISTAN-a ta kuli agutsü. Yisui nüsüngtem dang "NENOK KÜ KULITEM ASÜTSÜ" ta ashibaji ibaji lir. Pei sasa pei temeden bushia kuli sayuba masü, saka tangari na aser ni atema kuli agütsübaji tongtipangba lir. Tanü asen aliba tensa nunga Antiok Arogo nung aliba tamangertem dang "KHRISTAN" ta ajaba ama ajatsüsa karbo ali asü mali? Asenoki asenok sasa asüngdangdi. Tenüng agibo Khristan lima, tayimzükbo tuluka dang ayimzük saka mapabo mali. Naga limaji Khrista asoshi ta ayimoktsü saka telung mapatem reprangra Naga limaji atakatemi lima ta ashitsüsa kümogo. Khristan lima ka nung pocket nung sen tera-ka bener senzü majung auyar, tetsür tanur kima yimdong nung sadem-sadema mesenzüteter, ashi-auer nisung tamajunger asü, nisung tamajungertemji anüktsü ayuba tanükertem-ar mebendangteter, kechiba süra ozüng amertemi-ang ozüng nung aibelenba lima ka aküm. Ochiba to yimdong nung laoa lir, nükta pangta jabujaritsü konang nüngsang ama aküm, sen yong pei taküm ayoker jenti aküm. Ajak dak alaka Tsüngrem tenzükertem, toklang tenzükertem, Missionarytem, Evangelistem, Reverend-tem aika : rongsen penpuba nung sotaker, rongsen nung alanger nemzür aika tenük agi angur. Hau, ajakbo tamajung dangbo masü, saka karbo teka külen alu alaba nung amer aser teka külen tenzükba wadang nung amtaker aliba Tsüngrem tenzükertem aika tenük agi angudang temulungjang nung tasüngdangba aika dang arur. Laishibai yamai ashir-" Kilir kati Kibur ana külemi metenzüktet" kechiaser pai ka sempatsü aser tangar kaji meimtsü". Nenoki Tsüngrem aser rongsen külemi metenzüktet". (Mathi 6:22-24).

Temeim amangbapur tajungtem, asenok ya Yisu Khrista atema "KULISUR" ka-ka lir, naia ne mapa agi koda kuli asür ? Tebang ,agi onük tajungtem aika bendena kuli agütsüba dang nungi ne taküm aser kü taküm libaliro yimya jaklaliro yimya ajemalu shisatsü atenba tamanger, ajak den kasasa litetba taküm, ajak kübok yitetba taküm, iba amala tamanger ka jagi, O agi aika mejembiaka Antiok nung aliba tamangertem dang ajaba amaji asenok danga "KHRISTAN" ta ajatsüsa lidi ta iba Tsüngrem o ajanga ayongzükra. Tsüngremi iba o azünger ajak moatsütsü imlar.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Catholic putirtem dak teka sangshiba mechi parliament anokshi

New Delhi, Rongchii/April 05 (Agencies): Hopta tetenzüklen Madhya Pradesh nung Catholic putir ana dak teka sashiba mechi Khristanpur anema inyaksangshiba tali akumba indang parliament nung benoka jembitsü asüngdangba Hindu nunger tsütsü tejak shir aliba sorkai magizüki rongrong adoka liasü.

Indian National Congress-i anir political party 28 agi kumtetba opposition züngsemtem April 3, 2025 nü Parliament indang lower house, Lok Sabha nungi ayazüka ao.

Linük nung tamangba yimsü dak ajemdaker azüdokshiba indang jembitsü asüngdangba nung Hindu bhukumba BJP nungi House Speaker Om Birla-i memelaba yong longkak ait tenzük.

Madhya Pradesh nung Jabalpur yimti kübok police station ka nung March 31 nü Hindu nunger telok kati Catholic nunger putir ana dak teka sangshir ano Catholic nunger nisung 50 shi merenshiba indang jembitsü Kerala state nungi Congress züngsem Dean Kuriakose-i ken o benoka liasü.

Putirtem dak dena teka sangshiba ajanga Madhya Pradesh nung kin tila Khristanpur merenshiba indang jembitsü nüngdak kumogo ta ashi.

Putirtem dak teka sangshiba anema opposition party tulutiba, Congress züngsem tem parliament

complex nunga longkak aita liasü.

Kerala nungi Congress parliamentarian K.C. Venugopal-i osangbener dang ashiba agi, Vishwa Hindu Parishad (VHP-world Hindu council) züngsemtemi putirtem dak kanga mejungi züka merenshi. VHP ya Hindu nunger telok ka lir aser parnoki BJP bhukumer.

Putirtem dak teka sangshiba ya BJP aser parnok den sendaktepa aliba Hindu nunger telok temi kin tilatem aser arogo tem dak timtem agütsüba tatishitsü ka dang lir, ta Congress leniri ashi.

Taoba küm Hindu nunger telok balalai arogo 753 nung timtem agütsü. "Sorkari kecha meinyaker," ta pai parliament complex nungi osangbener dang ashi.

Putir ana ya Jabalpur diocese indang vicar general Davis George aser procurator George Thomas liasü aser tena ya tamangba yimsü melenba nung tai tonglokja Indigenous Catholic nunger nisung 50 pua aliba den yariteptsü asoshi Ranjhi police station-i ao.

Jila ka nungi kilometre 100 shi pilar tribal Catholic nunger ya Lenten pilgrimage nung shilem ka ama Jabalpur nung tekülem ki semdanga jajadang Hindu activists temi parnok mena aliba bus soiter police station-i anir ao.

Khristanpuri state indang anti-conversion law nung aibelener ta Hindu activists temi tai tonglochtsü. Parnoki

putirtem mejungi amshi aser tejak nung ama, shirnok tribal nisungtem pua aliba den yariteptsü asoshi police station-i arua liasü.

Jabalpur Superintendent of Police Sampat Upadhyay-i putirtem dak züka merenshiba atema mejangjaba nisung asem anema ken o benoka bushisüngdangba mapang lir ta osangbener dang ashi.

Police temi parnok dang nungi kuli meshiogo aser temang anepalu süogo, ta Father Thomas-i UCA News dang ashi. "Police temi ochishia bushisüngdang asütsü imlar," ta pai April 4 nü ashi.

India nung tashiyim amshia, mesüzüka aser ashikülak yimya amshia tamangba yimsü melendaktsüba anema ozüng tesashi yanglua aliba states 11 rongnung Madhya Pradesh ya ka lir.

Khristan lenirtemi ashiba agi, iba ozüng ya khenyongi mashi lenmang nung amshia parnok aser par institution dak tenük yoker aser parnok mission mapa ya mesüzükba mesüra tashiyim amshiba ama züngshir.

Iba state nung bishops, priests, nuns, pastor aser arogo tenzüker anema ken o aika benoka lir aser parnoki iba anti-conversion law nung aibelener ta tai tonglochtsür.

Madhya Pradesh nung Khristanpur ya ishika dang lir, kong nisung million 72 dak tema aliba nungi Hindu nunger shilem 80 aser Khristanpur shilem 0.27 dang lir.

ANOGO ABEN TSÜNGREM DEN

Tepela aluruba

- T. Ken 126: 1-6.

Iba ken ya 2 chubatem 19 aser Isaia 37 nung Tsüngremi kechi inyak iba nungi agiteta zülü, kodang Hezekia, Yihuda nung chuba alidang Sennacharib aser Assyria armyi Yirusalem lungpang, Yihuda nunger chiyongtsü asoshi kümzüchtsü nüngdaka liasü, kechiaser tsükchirtemi lemanng ajak nokdang Yihuda nunger chiyongtsü mengui liasü. Parnok alu rui aotsü mokoki liasü. Tsük senti liasü. Nüburtem kümzüker külen kodang parnok alui ao, parnoki telemtetba ka agi. Parnoki tsükji pei tanurtem atema amshitsü asü, mesüra prochtsü? Aluyimertemi ajep kechiaser parnok tsük ali nung prochtsü aküm(t.6). asenok ajak metsü proker aser tarurtem lir.

Tepela aluruba akatsü asoshi asenoki kechi inyaktsüla? Mezüngbuba, osangtajung metsüji prokang. Laishiba nung kuli asüba noksa aika lir (2 Kor.5:20, Zek.3:2; Matt. 4:19; 5:14). Osangtajung agi nüburtem atongbaji alu ayimba mesüka lir. Iba nung amalitep nungdaker, Kechiaser kari proker aser kari arur. Na aluruba nung shilem ka asü ?

Aluruba asoshi nai sarasademang. Kümzüka malir asoshi na tanü ajechtsü akok, saka kenü na pelatsü (Gal.6:9). Shirnoki osangtajung proker parnok tepela alururtem asütsü. Tanabuba, ne rongsen Tsüngrem sentsüwangshi asoshi prokang. Asenoki prokba asenoki arutsü(2Kor 9:6-11). Nisung aikati tamagitsü nung pei rongsen lalur. Missionarytemi teyari atar, arogo ulushitsü arogoi teyari atar. Asenoki mokuri prokra asenok tepela alururtem asütsü ta Pauli ashi.

Tesembuba, Tsüngrem Tanela Temeshi prokang (Gal 6:6-8; 5:16-23). Asenoki ya koda inyaktsü? Asenoki Tanela mapatemji asen mulungjang nung ayutsüla. Kodang asenoki Tsüngrem o nung shisadangdir (T.ken 119:11), asenoki Tanela aluruba arutsü. Temulungjangji atsüki ka mesüka lir, anungji asenoki aji reprangtsüla. Aji temulung meyipba. Temeshi alitsü mapang agiang, sarasademang, o nung shisadangang aser metsüji ne mulung nung remang.

Tanü nai inyakba ajakji aremer; metsü tajung arutsü jangjaang.

Muslim charity indang ozüng melenshiba Khristanpuri pelar

Thiruvananthapuram, Rongchii/April 05 (Agencies): Parliament nung bill ka agizükba ajanga pei talidak ki azüngtettsü aliba nungi kumzüchtsü ta tepela nung India south len Kerala state kübok tzükum anasa aliba yimtsüng ka nung Catholic nunger timba sür kibong 600 shi firecrackers poka tenüngsang agüja sarasadem aser nanglong lemsatepa liasü.

"Parnok ya parliamentary proceedings live repranga liasü. Ayatirm alemer bill agizükdang parnok pelatepa kati ka dak azüit," ta Valankanny Matha Church indang parish priest Father Antony Xavier-i ashi. Munambam yimtsüng nung mangatettep aliba ali nung iba arogo ya dena lir.

Union Minister for Minority Affairs, Kiren Rijiju-i iba bill ya Parliament nung April 2, 2025 nü benok. Iba bill ya Muslim nungeri charity atema sempet agütsüba rongsen, koba dang

Islamic law nung Waqf ta ajar, iba ozüng nung temelenshi kar yanglutsü asoshi liasü.

Mezüng yangluba Waqf Act 2013 yagi Waqf Boards nem tashi tali agütsür aser parnoki bushisüngdangba nung ajemdaker ali kimong mashi waqf li ta tenüng agütsütsü melar. Ozüng nungsa mangatettep adokba Muslim nunger timba aliba Waqf Tribunal nung bentettsü aser iba telemtetba ya court dangi mabentsü shia lir.

India nung waqf dak sendakba ali ken o mangatettep 21,600 dak tema mebenteti lir, ta central sorkari ashir. Sorkar indang Press Information Bureau ajanga ashiba agi, yangji sorkar meyong ali kimong 5,977 dena lir, koba Waqf meyong ama züngshir.

Anungji ozüng yanglushiba ya ajanga kuli kecha makai kibur akumtsü Waqf board dak tashi aliba agentsür aser ali ken o bentetba nung Indian courts

aser administrative systems aittsü melar.

Munamban nung alirtemi ashiba agi, iba bill ya ozüng kumerbo waqf board ajanga kibur kuma aliba ali kimong aser ki o jen indang ken o bentetba nung yaritsü ta ashir.

April 4 nü tembangba parliament session indang house anaprong nung iba ozüng ya agizükogo aser India Tir Draupati Murmu-i meyongnem agütsütsü ata lir.

Sorkari iba ozüng ya mapa kuma amshitsü asoshi teinyaktsütem densema official gazette nung adoktsüba sülen ang amshitsü.

"Asen nüburtem pelateper, kechiaser parnok pei ki yutsür maotsü," ta Xavier-i UCA News dang April 4 nü ashi.

"Küm 40 shi jakdang aliba ali nung temeden meyipa angutsü asoshi asen nüburtemi mapang talangka matatsü imlar," ta Father Xavier-i ashi.

Küm asem tejakdang waqf meyong ta kumtsüba sülen

Kerala sorkari nüburtem dang nungi land tax meshiba anen, aser iba yongji parnok ali nung kibur mekumteter aser temeden malir.

Item ken o nung sorkar aser court temi shilem agitsü memulung nung yimdaklir temi October 2024 nung lumia longkak ait tenzük.

April 4 nü iba longkak aitba anogo 174 ajung. "Asen nüburtem pei ali kimong temeden mangu tashi maneni longkak aittsü," ta putiri ashi.

Secular constitution indang tanüla nung Waqf ozüng yanglushiba ya "temelenshi tajung ka lir" ta Catholic Bishops Conference of India (CBCI)-ia pelashishia agizükogo.

CBCI indang odongtar Father Robinson Rodrigues-i April 4. 2025 nü UCA News dang ashiba agi, iba ozüng nung temelenshi yagi Muslim nunger densema nisung ajak ajangzüchtsü, kechiaser waqf board yagi Muslim nunger aika

indang jurila ali kimong agia lir.

Arogo-i ozüng nung shilem kar dang anema nokdaker aser yangji Muslim nunger anema tamajung bilemba mali, ta Eastern rite Syro-Malabar Church indang odongtar Father Antony Vadakkekara-i UCA News dang Hokulbarnü ashi.

Waqf Bill nung temelenshi alitsü bhukumba ya Bharatiya Janata Party (BJP) bhukumer ama mangatettsüla, shirnoki New Delhi aser state aika nung sorkar kumteta lir aser region balala nung Khristanpur anema azüokshiba nung tai tonglokja lir, ta pai ashi.

"Arogo ya yimtenren nung maden aser party kata bhukuma menokdaker. Kin tila ama Khristanpuri Muslim aser danga kin tilatem pei temeden asoshi nokdakba nung yaritsü," ta paisa ashi.

India nung nütsüng yongsük 1.4 billion aliba nung Khristanpur shilem 2.3, Muslim nunger shilem 14 aser Hindu nunger shilem 80 shi lir.

AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim

Temchiriji

(adj) terata tia (dilemma)


* Telemtetba magitet temchiriji dang anogo süidaktsü.

Temdak

(adv) tom nung antak/idaka ayu (stop on way from falling)

* Süngdong nungi süngjang tsükba tom nung temdak.

OLONG PAITEP # 7114



TIPIEN

2. Takang - (8)
4. Aketa shirangba - (5)
5. _ _ _ _ a - (4)
7. Taküm nung tajung
tamajung telemzükba - (3)
8. Tetsürtem zünga aser kidong
kasa tsüngda jatepba - (5)
9. Ola tashi agi adok - (3)
11. Tashi _ _ _ _ - (4)
12. Anü nungi kümzükdak - (5)
13. Süng tapu küma arangba - (8)

LANGTSÜNGLEN

1. Tesümgangtsü mapa - (9)
2. Süngdong tetenzükdak - (4)
3. Tar tatsü - (6)
6. Alia - (5)
8. Prangbong atema nungdak - (6)
10. Taret bentet - (4)

OLONG PAITEP # 7113 TELANGZÜBA

TIPIEN :

1. Telok, 4. Aluru, 6. Ozüing, 8. Emk,
9. Kin, 10. Teti, 12. Süir, 13. Jen,
14. Ola, 16. Talak, 17. Mazük.

LANGTSÜNGLEN :

1. Tenükjang, 2. Luden, 3. Kiochtsü,
5. Lenti, 7. Tajangzük, 11. Teronem,
12. Sempa, 13. Jahaz.

NAI-A YA METETTER MA



Alima nung takartiba 10:

Rank	Name	Net Worth (USD)	Source of Wealth	Country
1	Elon Musk	\$433.9 B	Tesla, SpaceX	United States
2	Jeff Bezos	\$239.4 B	Amazon	United States
3	Zuckerberg	\$211.8 B	Facebook	United States
4	Larry Ellison	\$204.6 B	Oracle	United States
5	Bernard	\$181.3 B	LVMH	France
6	Larry Page	\$161.4 B	Google	United States
7	Sergey Brin	\$154.0 B	Google	United States
8	Warren Buffet	\$146.2 B	Berkshire Hathaway	United States
9	Steve Ballmer	\$126.0 B	Microsoft	United States
10	Jensen Huang	\$120.2 B	NVIDIA	United States



April 5, 2025: Assam Pradesh Congress Committee züngsemtemi Assam Cooperative Apex Bank nung ochi mashi ken o anema Guwahati nung longkak aitba noksa nung angur.

RHAC election nung BJP-i aniba NDA party-i menden 33 kokogo

Guwahati, Rongchii/April 5 (Agencies): Assam Chief Minister Himanta Biswa Sarma-i Honibarnü sangdong ka ajanga, BJP-i aniba NDA party-i Rabha Hasong Autonomous Council (RHAC) election nung menden 36 nungi 33 kokogo, ta metetdaksü.

Chief Minister-i pa indang social media handle X ajanga ashiba agi, "Assam nung ano Saffron Wave ka! Rabha Hasong Autonomous Council kübok aliba nüburtemi ola ka ser jembiba aser Ato Kilonser @narendramodi indang welfare policy tem aser talisa indigenous lokti tem atema policy balala benokba ajungkettsüba atema tenüngsang agütsür."

NDA-i menden 36 nungi 33 kokogo, ta paisa metetdaksü. Assam State Election Commission-i sangdongba result ajanga Rabha Hasong Autonomous Council (RHAC) election nung takok angurtem jangjaogo.

Iba tribal council election nung Congress-i menden ka dang akok aser kasa mapang nung Bharatiya Janata Party (BJP)-i menden 6 koka liasü.

BJP den sendaktepa aliba Rabha Hasong Jautho Sangraam Samiti (RHJSS) party-i menden 27 koka liasü. Independent candidate anatia election nung takok nguogo.

RHAC Chief Executive Member (CEM), Tankeswar

Rabha, No-7 South Dudhnoi council constituency nungi toktepba sülen ano term ka abentsü maongka ngutetogo.

Rabha-i vote 7,164 ngua Congress candidate Sanjib Kumar Rabha koka liasü, shibai vote 1, 593 nguogo.

Taküm iba election nung nüburtemi kanga junga shilem agia elector lakh 4.46 nungi shilem 69-i vote agüja liasü. Election ya Assam nung Goalpara aser Kamrup district kübok RHAC constituency tem nung agia liasü.

Maneni State Election Commission-i ashiba agi, final results tang renemdar aser mapang tapet nung sangdongtsü.

Manipur nung security forces temi prangbong injang ngutet

Imphal, Rongchii/April 5 (Agencies): Manipur kübok Kangpokpi aser Imphal West na tsüngda tesemtem meita aoba mapang Hokolbarnü telungpur teseptem nung Indian security force temi prangbong injang aser tanga hadir balala aika ngutetogo.

Kangpokpi den atonga Imphal West District kübok Sekmai police station nung Khamaral Mamang Ching tenem nung Khamaral yimtsüng nung prangbong injang yua aliba indang itangitertem nungi osang tejangja angazükba sülen Assam Rifles aser Manipur police nati temulung melemba

tesemtem meita oa liasü.

Police-i ashiba agi, tesem balala kanga junga bushisüngdanga aoba sülen prangbong, injang, digital device tem aser tanga hadir balala aika nguteta liasü.

Ajisüaka security force temi ken o dak sendakba nung nisung ka danga mapu. Meita aoba sentong ya ghonda 2 shi agia liasü.

Maneni Police-i ashiba agi, meita aoba mapang parnoki SLR ka den Magazine ka, modified .303 Rifle ka den Magazine ka, Pistol ana den magazine ana, Air Gun 2, 9 mm Pistol Magazine ana, 7.62 mm LMG Magazine (one defective)

asem, defective 9 mm Carbine Magazine ka, INSAS LMG Magazines (one defective) ana, Plates trok (Plastic Plate ka aser Rubber Plate pongu), bulletproof Vests asem, Camouflage Vest ana, Camouflage Helmet pezü, Camouflage Shirt asem, Camouflage Pants tenet aser Camouflage Cap pongu ngutetogo.

Ken o maneni bushisüngdangtsü atema security force temi parnoki apuba prangbong injang aser hadirtem ya Manipur police nem bendanga agütsüogo, ta police-isa metetdaksü.

NEHUTA & NEHUNSA nati Pro VC tem mapa nungi anentsü akhanger

Shillong, Rongchii/April 5 (Agencies): North Eastern Hill University, NEHU Teachers' Association (NEHUTA), aser NEHU Non-teaching Staff Association (NEHUNSA) nati Vice Chancellor, Prabha Shankar Shukla 2025 küm March 6 nü nungi office-i maruba ashishio.

Iba lokti tentet ana yagisa, Assistant Register, Planning aser Registrar, Omkar Singh-i osang agütsüba dak ajemdaker ketdangsurtemi Pro VC ana ya shimogo.

VC, shiba Shillong nung NEHU headquarters nung mali, pai NEHU temzüng ozüing kübok latetja aliba ama inyakyim shitak benoka minyak, ta telok

Marak na dang NEHU indang Shillong aser Tura campus indang Pro VC ama tena shimba nungi tanga tang resignation agüja atsüingintsü atema mepeshia metetdaksüogo.

Lokti tentet ana yagi ashiba agi, Executive Council senden nung züngsemtem abensa meliaka Assistant Registrar, Planning, aser Registrar Omkar Singh-i osang agütsüba dak ajemdaker ketdangsurtemi Pro VC ana ya shimogo.

NEHUTA aser NEHUNSA natisa, Union Ministry of Education-i Prof Shukla dak sendakba nung inquiry committee indang osang tang tashi mesangdongi lir.

ana yagi ashi.

Parnokisa, Omkar Singh shiba 2024 küm November 23 nü nungi leave nung lir pai agütsüba shiti ya Acting Vice Chancellor-i 2024 küm November 23 magi kumdaksüogo, ta ashi.

Parnoki Prof Sungoh aser Prof Marak na shimba mapa agizükba ajang ajanga aitsüogo aser ashiba agi, Prof Shukla-i temzüng ozüing anema inyaksangshio.

HIGH COURT ORDER AJANGA IMTIANGNEN ASER PAR KIBONG YIMJENKIMONG NUNGI KÜM 30 ARIDOKBA ANENTSÜA ATAR TA ADOKTSÜOGO

Mr. Imtiangnen aser Mr. Pangerchiba tena Log mapa inyakba nungi adokba ali ken o ka nung Yimjenkimong Village Council-i 16.12.2022 anogo nung Imtiangnen dang Ak ka senchi agüjang ta obendang agütsü. Mr. Imtiangneni ADC, Mangkolemba, dangi iba Indang ken o aben. ADC, Mangkolembai iba case agitsü Mangkolemba Dobashi Customary Law Court nem agütsü. Saka Dobashi Courti arutsü melena Yimjenkimong yimsüsürtemi Imtiangnen aser par kibong yimdak nungi küm 30 aridoker ta telemtetbatem agia sangdong agütsü. Iba case nung High Court order dated 25.10.2024 (WP(C)/254/2024) ajanga Imtiangnen dang Ak ka Senchi meshiba aser pa aser par kibong yimdak nungi küm 30 aridokba telemtetbatem ajakji anentsüa atar ta adoktsüogo.

AO RIJU SANGDONG

Rongchii 7, 2025 anogo nungi class 9-12 nung azüngba kaket (Textbook) Aor Lokti Puti Rajem Tebhong Ka aser Ana, Pentochepchep Ritsüing aser Orülem aser Olem kakettem office nungi talitsü angutsü.

(I. Temjen Tzüdir)
P/Head, Ao Riju

US-i Indian Ocean-i B-2 stealth bombers yokogo

Washington, Rongchii/April 5 (Agencies): United States-i, Indian Ocean nung Diego Garcia asetkongi B-2 Spirit stealth bombers trok yokogo, koba iba tesemi tang iba tayimtsü timtiba yokba asütsü.

Middle East nung tensa mejungi aliba mapang iba jenjang agiba ya Iran aser parnok den sendaktepa alirtem nem osang tesashi ka agütsüba ama reprangteter.

CNN sangdong ka ajanga ashiba agi, tayimtsü trok ya America indang B-2 fleet asemsü nung ka lir, kechiyong B-2 fleet nung tatimtsü 20 dang lir.

Bomber shia jenjang USD billion 1 dak tema lir aser iba tayimtsü nung "Massive Ordnance Penetrator," ka benteter, koba 30,000-pound bomb ka lir aser iba yagi Iran indang nuclear sites amala ali telung nung yanglua aliba tesemtem dena maktettsü.

US-i linük ka mejeta metteshi, saka military expert temi item tayimtsütem yokba ya Iran aser Yemen nung Iran-i teyari agütsüba Houthi tekok dak rangloker yokba lir.

AP-i ashiba agi, B-2 tayimtsü ya taoba mapanga Houthi pur amakba mapang amshioago aser Diego Garcia ya Yemen aser Iran naprongla anasa lir.

US tir Donald Trump-i nuclear atema sensaksemtsü Iran ayongzüokogo. Fox News den sensaksemba mapang pai, "Iran achaayangtsü atema lenmang ana lir: kaji military tashi agi mesüra nenoki tenangzüktepba ka yanglutettsü. Ni tenangzüktepba-ang yangluner, kechiyong ni Iran yirutsütsü asoshi tebilemba mali," ta ashi.

Trump-i 2015 küm Iran nuclear deal nungi atsüingin aser iba sülen Iran-i nuclear programme ya nangzükteper aliba dang nungi tali

atsülangogo.

Trump-isa, "US nunger rong dak akhaba anenang aser onoki nenok dak makhatsü. Ajita mesüra onok tetenzüker dang aser shitakba tashibajibo Houthis aser parnok nem teyari agütsür Iran naprongla atema metenzüki lir," ta ashi.

United States tir Donald Trump-i ceasefire benoktsü atema nongshiba mapang Hokolbarnü tir Volodymyr Zelenskyy soa ainba yimti makogo aser iba ajanga nisung aliba kitem raksatsüba den mi adokdakja liasü, ta Dnipropetrovsk Governor Serhiy Lysak-i Telegram messaging app nung zülutsü.

United States tir Donald Trump-i ceasefire benoktsü atema nongshiba mapang Hokolbarnü tir Volodymyr Zelenskyy soa ainba yimti makogo aser iba ajanga nisung aliba kitem raksatsüba den mi adokdakja liasü, ta Dnipropetrovsk Governor Serhiy Lysak-i Telegram messaging app nung zülutsü.

Iba amala missile ya target

Yangon, Rongchii/April 5 (Agencies): Myanmar nung menoknok tesashi ka anokba sülen iba lendong nung asür 3,300 dak tema jungogo aser kasa mapang nung Nations aid tekolakbai Myanmar nem teyari agütsütsü alima kintem ayongzüokogo.

7.7 magnitude tesashi menoknok ka agi iba Southeast Asian linük ya March 28 nü anoshitsüba sülen nisung 3,354 süogo, nisung 4,508 yiruogo aser nisung 220 samar maneni bushidar, ta state media sangdong ka ajanga Honibarnü metetdaksü.

United Nations' ketdangürtemi Mandalay nung lendong agi kongshir alirtem den

South Korea nung Yoon pusemertemi longkak ait



Seoul, Rongchii/April 5 (Agencies): Martial law benokba atema taoba tir Yoon Suk-yeol mapa nungi aginba anema South Korea nung nüburtem meyrejang aikati yimtung nung longkak aitogo.

South Korea indang Constitutional Court-i, December 3 nü martial law benokba atema Hokolbarnü Yoon mapa nungi agintsü obendang agütsüogo aser iba ajanga ita aika yimden yimsüsüba tsütsü mesüngjemteti aruba sülen June ita election agitsüsa kümogo.

Okadaki obendang magütsüba ajanga South Korea nung mapang talangka tensa

mejungi aruogo aser Yoon pusemertem aser pa anemertemi linük yimtiba Seoul nung hoptashia longka aita aruogo.

Koream temzüng ozüng kübok anogo 60 tsüngda tir election tasen ka agitsü nüngdaker. Iba masü tashi acting tir Han Duck-soo-i tir mapa bena atatsü.

Honibarnü Yoon pusemertemi linük yimtiba nung longkak aitogo aser pa mapa nungi anentsüba ya temzüng ozüng alema aser election agitsü aliba ya thiang ta yimyim ayima liasü.

"Constitutional Court telemtetba ajanga asen linük free democracy raksatsüogo,"

ta arishi küm 26 tain longkak aiter Yang Joo-young-i AFP news agency dang ashi.

Yoon-i, pai martial law benokba ya state anema nokdakba tashitem raktoktsü atema liasü, ta shiogo.

Ajisüaka Hokolbarnü pai, okadaki obendang agütsüba ya agizütsü ta shiogo.

Hokolbarnü obendang agütsüba sülen Seoul nung Yoon yimsüsüba anemertem aika pelatepa liasü, saka pa nem tamangba yimsü lenirtem aser right-wing YouTubers temi teyari agüja laisü.

Kasa mapang nung opposition lenir Lee Jae-myung ya taruba election nung takok angutsü imlar rongnung ka lir.

Russia-i Kryvyi Rih amak; tanur densema nisung 18 tepset

Kyiv, Rongchii/April 5 (Agencies): Russia-i missile agi Ukraine kübok Kryvyi Rih nung nisung aliba tesem ka amakba sülen tanur teku densema nisung 18 tepsetogo, ta local ketdangsürtemi metetdaksü.

Telegram nung prokshiba video ka nung asürtem aser yirur alirtem pavement nung mepidaka aliba aser nisung ka asayaba moapu ka nung mepidaka aliba nguogo.

Iba lendong nung nisung 50 yiruogo, ta emergency services-i ashiba den yirur alirtem timba küma odar, ta shisem. Ita asem kinü tanur ka densema nisung 30 dak tema Lysak nung mozükidangi anirogo.

Russia nunger sepaitemi iba yimti amaktsü atema ballistic missile ka amshia liasü, ta human rights ombudsman Dmytro Lubinets-i ashi.

Iba amala missile ya target

atongtsü atema minute ishika dang agir aser high end air defence-i mesüra khadangtsü tasak.

"Military facility ka danga mamak, civilian infrastructure dang amak," ta Lubinets-i Telegram nung zülutsü.

Russia Defence Ministry-i ashiba agi, parnoki iba yimti nung Ukraine nunger sepaitem aser bendanger instructor tem adenshia aliba tesem ka nung missile ka khaloktsü.

"Iba tesem amakba sülen tsükchir servicemen aser bendanger officers 85 taküm samaogo aser gari 20 raksaogo," ta ministry-i

Telegram ajanga ashi.

Zelenskyy-i Hokolbarnü, nüburtem kümzüksü atema maneni jenjang agidar ta ashiba den anüolen aliba linüktem dang Moscow tali nongshitsü ayongzüka liasü.

"Alima ajungai ngudar. Missile shia aser drone-i amakba shia Russia-i raratsü atema dang jangrar ta kuli agütsür," ta pai Telegram nung zülutsü.

Russia-isa, manger mesangwa tsüngda drone amashia Kharkiv yimti amak aser iba mapang nisung pezü tepsetba den nisung 35 yiruja liasü, ta regional ketdangsürtemi metetdaksü.

Myanmar menoknok lendong nung asür 3,300 dak tema jungogo

Yangon, Rongchii/April 5 (Agencies): Myanmar nung menoknok tesashi ka anokba sülen iba lendong nung asür 3,300 dak tema jungogo aser kasa mapang nung Nations aid tekolakbai Myanmar nem teyari agütsütsü alima kintem ayongzüokogo.

7.7 magnitude tesashi menoknok ka agi iba Southeast Asian linük ya March 28 nü anoshitsüba sülen nisung 3,354 süogo, nisung 4,508 yiruogo aser nisung 220 samar maneni bushidar, ta state media sangdong ka ajanga Honibarnü metetdaksü.

United Nations' ketdangürtemi Mandalay nung lendong agi kongshir alirtem den

ajurutepogo.

"Linüktemi Myanmar nung aliba nüburtem nem teyari agütsütsüla," ta Tom Fletcher-i X nung zülutsü.

Paisa, menoknok anokba sülen humanitarian aser lokti tentet kwinakati tasü ita temulungtetba tulu nung teyari agütsüogo parnok nem tenüngsang agütsü.

"Nisung aika pai akaba ajunga samaogo, saka taküm alirtem kümzüksü atema maneni teyari agütsüdar," ta Fletcher-i ashi.

Military sorkar tekolakba Senior General Min Aung Hlaing, Bangkok nung regional summit ka nung dener meyipa aruba sülen asürtem indang

osang ya sangdonga liasü.

Kasa mapang nung India Ato Kilonser Narendra Modi-i menoknok anokba sülen Myanmar nung khi atema ceasefire benoker aliba ya teti atema küm daksütsü ayongzüokogo aser ashiba agi, election agitsü aliba ya ajak atema asütsüla aser odangtettsüla, ta Indian foreign ministry otongdari ashi.

Lendong atalokba sülen taküm alirtem kümzüksü atema teyari agütsürtem rongnung China, Russia aser India nunger mezünpur liasü.

Yimya agi lendong balala atalokba mapang United States ya mezünpur asür

saka tir Donald Trump-i linük indang humanitarian aid agency atongsatsür lir.

2021 küm Aung San Suu Kyi-i aniba civilian sorkar atsüngtokba sülen military-i Myanmar tiptema yimsü mesüteti arudar aser linük rongsenketzüng kanga mejungi aliba mapang ka nung tang menoknok anokba ajanga linük jenjang tamajungba küm daksüogo.

UN Office of the High Commissioner for Human Rights-i Hokolbarnü ashiba agi, military sorkari parnok pu masemertem shirnok menoknok agi kongshir lir, parnok nem teyari agütsütsü tenokdangba agütsüdar.

Dilong Ward-i 6 th Mokokchung Inter-Ward Football Tournament marok benogo



6th Mokokchung Inter-Ward Football Tournament takoker Dilong ward noksa nung angur.

Mokokchung, Rongchii/ April 02 (TYO): 6 th Mokokchung Inter-Ward Football Tournament Final Dilong ward aser Sangtemla Ward asayaba nung Dilong Ward-i kokteta takok marok benogo.

Dilong ward aser Sangtemla Ward tsungda tanu final asaya dang asaya tenzüker anisüngzükbapang tashi nung telok katia goal meyoktet, tanaben ground aita asayadang minute 76 buba nung Dilong telok nung jersey no-10 Takotuba-i goal-1 yok aser ano minute 90+2 nung

Dilong telok nungisa jersey no-20Temsutoshi-i goal-1 yokteta Dilong Ward-i iba goal ana jagi Sangtemla ward kokteta 6 th Mokokchung Inter-Ward Football Tournament marok benogo.

Iba tournament nung Champion-i sen Rs.50000/- den marok agizük aser Runners Up-I Rs.30000 agizükba den ano Best discipline team Kumlong ward,Best Coach Bendangsunep Dilong Ward,Emerging player Longkham Sungkomen ward, Highest scorer(6goals)Tarepnungsang

Sungkomen ward,Best goalkeeper Imtisashi Dilong ward, Best defender Maochang Dilong ward aser Player of the tournament Nungshisashi Sangtemla ward ta jenjang nguteta sempet agizüka liasü.

Final asaya metenzükdang sentong tatsüka agiba nung tetushi tejaoker Wb.Imkongchuba Chairman Mokokchung Municipal liasü adser pai tajungshi o tatsüka jembiba den paisa asayartem den ajurua salem süa metetpelar kelen pai ball metsüa asaya tenzükbapang liasü.

Küm 25 sülen Mueller-i Bayern Munich toktsütsü



Rongchii/April 5, 2025 (Agencies): Bayern Munich nungi asayar tejen Thomas Mueller-i Honibarnü sangdong ka ajanga, club-i pa nem contract tasen magütsütsü aser iba yongji pa iba club nungi küm 25 asayaba sülen taküm tatembang asütsü, ta ashi.

Arishi küm 35 tain asayar shiba indang contract taküm lemluwa tembangtsü liasü, pai social media nung post ka ajanga ashiba agi, club-i iba telemtetba ya agiogo, koba pai mulungbabo masü.

Mueller-isa, tawa yimjak nung pa indang contract dak sendakba nung ken o atsütepba ya pai maginü liasü, ta ashi, saka pai pa Bayern nungi mapang talangka asayaba mapang inyakyim ajak nung densema alirtem dang kanga pelar ta shisem.

"Club aser fan tem den

tesendaktep tajung ya teti alitsü," ta pai ashi.

Mueller ya Bayern junior system nungi anitetba asayar ka aser pai Champions Leagues ana den Bundesliga titles 12 benogo.

Pa tang league title ya Munich-i meyipa bener arutsü aser tang asaya aliba season nung Champions League final tonga asayatsü atema rangloker asayadar. Taküm Champions League final Bayern indang Allianz Arena nung asayatsü lir.

Honibarnüsa Bayern-i sangdong ka ajanga, Mueller nem tetushi agüja testimonial match ka ayongzüka asayatsü aser pa July ita Club World Cup nunga asayatsü, ta metetdaksü.

Mueller ya Weilheim nung aso aser arishi küm 10 asüadang club nung adenba sülen 2008 küm coach Jurgen Klinsmann kübok mezüngbuba Bayern

nungi asaya liasü. Pa mezüngbuba asaya ya tang Bayern coach Vincent Kompany asaya aliba Hamburg club ka den asaya liasü.

Mueller ya club ka nung dang asayaba asayar ka aser pai Bayern tenüng nungi asayamung balala nung asaya 743 nung asayar lir. Pai club atema goal 247 idaktsüba den assist 273 süja lir.

Tawa pa substitute ama dang asaya arudar aser iba ajanga pai club toktsütsü akok ta bilema aruogo.

Midfield nung asayar yagi, pa taruba season kong asayatsü iba indang osang magütsü, ajüsüaka German media sangdong balala ajanga ashiba agi, pa MLS nung asayatsü atema United States-i aotsü akok.

Bayern nung taoba mapang külemi asaya alisang Eric-Maxim Choupo Moting, shiba tang MLS nung New York Red Bulls nungi asayadar, pai March ita Kicker dang ashiba agi, par club nung adentsü atema Mueller pelashishia agizüksü.

Germany team nungi 2014 küm World Cup akokba asayar ya 2024 küm Euro tembangba sülen international asaya nungi anena liasü.

Pa linük tenüng nungi küm 14 asayaba mapang 131 ben asayaogo aser iba mapang goal 45 idakja liasü.

Mats Hummels asaya nungi anisüngzüker

Rongchii/April 5, 2025 (Agencies): Mats Hummels-i iba season tembangba sülen pa football asaya nungi anentsü ta sangdongogo.

Roma defender aser 2014 küm World Cup koker aliba asayar yagi Hokolbarnü sangdong ka ajanga pa iba season tembangba sülen professional soccer asaya nungi anisüngzüksü ta shiogo.

"Ni kü tebilemba maziükteti lir," ta arishi küm 36 tain Hummels-i X nung video ka ajanga ashi.

"Football asayar shingaia mepaitoktetba mapang ka tongogo. Küm 18 asayaba aser football-i kü nem aika agütsüba sülen ni taküm lemluwa asaya nungi anentsü," ta Hummels-i ashi.

Hummels ya September ita free agent ka ama Roma nung küm ka atema oa aden. Pa den tenangzüktepba küm ka atsülangtsü atema lenmang lapoka yur liasü.

Pai Borussia Dortmund nungi anaben aser Bayern Munich nungi asemben ta Bundesliga ponguben kokogo aser pa ya Germany nunger

defender tem rongnung tajungtiba ka ta züngshir.

Pa June ita contract tembangba sülen Dortmund toktsü. Pa iba club nungi küm 13 asayaogo.

Hummels ya Dortmund nung anaben asayaogo. Mezüng 2008 nungi 16 tashi aser tanabuba 2019 nungi asaya liasü. 2011 aser 2012 küm Dortmund puri Bundesliga akokba aser 2012 o 2021 küm German Cup akokba nung pai teyari agütsü aser parnok Champions League nunga anaben tashi final tonga asayaogo.

Pa taoba season kanga junga asaya tembang saka EURO atema Germany squad nung mezüngoksemba ya taoksatsüka liasü.

Roma nung Hummels jenjang ya junglajungket ka lir. Pa club nung adenba mapang anema liasü aser coach Daniele De Rossi hopta ana dang lir mapa nungi anentsü.

Ivan Juric-i pai aibenbo mamshi, saka taküm Roma indang coach tasembuba Claudio Ranieri-i Hummels ya asayadakja arudar.

Shooting World Cup: Kaur Samra-i gold angu



Altukhova-i point 445,9 ngua lai bronze medal nguogo.

Asayamung nung mezüngbuba anogo medal ka danga maguba sülen tananübuba India team-i gold ka aser bronze ka ngua parnok tanabuba jenjang nung lir. Tebur 3P nung Chain Singh-i bronze medal ngua liasü. Tang tashi nung China-i gold ka aser silver ka ngua parnok temaba jenjang nung lir.

Asaya nung Sift-i kanga junga asaya-a qualifying nung lai point 590 ngua la ajak dang temaba jenjang nung liasü.

Finals nung Cairo 2022 world champion China tsür Miao Wanru China, aser junior air rifle world champion Zifei Wang aser Swiss tsür Emely Jaeggi, Altukhova, Germany tsür Mangold o Nele Stark n aser Austria tsür Olivia Hoffman nunger densema liasü.

Asaya nung Sift-i Kneeling position nung 10-ring nung khien danga mekashi, saka Prone position nungbo lai kanga junga asaya aser temaba jenjang nung alila Nele Stark point 4.3 agi memenepi liasü, saka iba mapang tashi nunga pa tibuba nung liasü.

Nokdaker khatepba mapang lai point 52.3 nguteta la tasembuba jenjanga atu. Iba sülen lai tanabuba series nung point 51.2 ngua la tejakdang aküm aser gold medal ngua liasü.

Rongchii/April 5, 2025 (Agencies): Sift Kaur Samra-i Hokolbar aonung Tiro Federal Argentino de Buenos Aires shooting range nung tang asaya aliba ISSF World Cup nung tetsür 50m rifle 3 positions (3P) final nung gold medal ka nguogo.

Taküm küm atema mezüngbuba ISSF World Cup nung lai India atema mezüngbuba gold medal nguogo.

World record bener alila yagi first Kneeling position nung shot 15 nü Germany tsür Anita Mangold point 7.2 agi memenepi liasü, saka tanabuba Prone aser final Standing positions nung kanga junga asaya-a gold medal ngutetogo.

45-shot final sülen Sift-i point 458.6 angu aser Mangold-i la point 3.3 agi memenepi 455.3 ngua silver medal angu. Junior World Championship medalist Kazakhstan tsür Arina

BILEMDANGANG

"Amajok watidak nü mapang timtok."